



# ज्ञाजलपा वाःपौ

JWOJALAPA NEPALBHASA WEEKLY

दँ ६ ल्याः ४१ (पूर्णङ्क ९३) ने. सं. ११३६ चौलागा नवमि आइतवाः २०७३ वैशाख १९ गते आइतवार (May- 01, 2016)

मू ८।-

## नेवाः पत्रकार दबूपाखें महासंघया ज्ञापन पौ



सत्यनारायण बहादुर श्रेष्ठयात महासंघया संस्थापक नायः अले धर्मादित्य धर्माचार्ययात मातृभाषाया न्हापांम्ह पत्रकार घोषणा यायेमाःगु न्हापांखुसि औपचारिक रुपं माग

### ज्वजलपा वाःपौ

नेवाः पत्रकारतयगु राष्ट्रिय संगठन नेवाः पत्रकार राष्ट्रिय दबूया न्हूगु नेतृत्व नेपाल पत्रकार महासंघया केन्द्रीय ज्याकु संचारग्रामय वना न्हापांखुसि औपचारिक रुपं ज्ञापन पौ लःल्हायेगु ज्या याःगु दु ।

पत्रकार महासंघया वैशाख २० व २१ गते चितवनय जूवनाचंगु विशेष साधारण सभा अर्थात विधानसभायात लक्षित याना नेवाः पत्रकार राष्ट्रिय दबूपाखें ज्ञापन पौ लःल्हायेगु ज्या याःगु खः ।

नेपाःया पत्रकारतयत संगठित यायेगु ज्या न्हापांखुसि यानादीम्ह सत्यनारायण बहादुर श्रेष्ठ २००८ सालय नेपाल पत्रकार संघ गठन यानादीगु अले अबले वयकः नायः जुयादीगु जुया व हे पत्रकार संघया रुप आः महासंघ जूगु अवस्थाय नेपाल पत्रकार महासंघया नायः १२ सालय नेपाल पत्रकार संघया नायः जुयादीम्ह पुलांम्ह प्रधानमन्त्री कृष्णप्रसाद भट्टराईयात संस्थापक नायः धकाः तयातःगुलिइ आपत्ति प्वकुसें आर्विल सत्य नारायण

बहादुर श्रेष्ठयात संस्थापक नायः घोषणा यायेमाःगु माग याःगु खः । अथे हे नेपाःया न्हापांखुसि मातृ भाषाया पत्रकारिता सुरु यानादीम्ह धर्मादित्य धर्माचार्ययात नेपाःया न्हापांम्ह मातृभाषाया पत्रकार धकाः घोषणा यायेमाःगु माग याना ज्ञापन पौ लःल्हाःगु खः ।

पत्रकारतयगु हक अधिकार, श्रमजीवी पत्रकार ऐन, मातृभाषाया पत्रकारितानिसें संचार ख्यलय समावेशीयताया विषययात कया नं ज्ञापन पतिइ उल्लेख जुयाचंगु दु ।

नेवाः पत्रकार राष्ट्रिय दबूया केन्द्रीय नायः श्रीकृष्ण महर्जन नेपाल पत्रकार महासंघया केन्द्रीय नायः डा. महेन्द्र विष्टयात उगु ज्ञापन पौ लःल्हाःगु खः । ज्ञापन पौ लःल्हायेगु भवलय नेवाः पत्रकार राष्ट्रिय दबूया मूछ्याञ्जे सुनिल महर्जन ज्ञापन पतिइ उल्लेख जुयाचंगु माग वना न्यंकादीगु खः ।

पत्रकार महासंघया ज्याकुथिइ दबूया केन्द्रीय नायः, मूछ्याञ्जे नाप नाप न्वकूपिं नृपेन्द्रलाल श्रेष्ठ, टिका प्रधान, उदेन

न्हूसायुमि, मिरा अमात्य, छ्याञ्जे केके मानन्धर, दांभरी सुरेन्द्रभक्त श्रेष्ठ, दुजःपिं नविन जोशी, राजेन्द्र शाक्य, सानुकाजि महर्जन, येँ जिल्लाया नायः नातिकाजि महर्जन, यल जिल्लाया नायः सुरज व्यञ्जनकार, खप जिल्लाया नायः इश्वरकाजि खाइजुपिं सहभागी जुयादीगु खः ।

नेपाल पत्रकार महासंघपाखें नायः डा. विष्ट नाप नाप न्वकू खिलबहादुर भण्डारी, मूछ्याञ्जे उजीर मगर लगायतपिं सहभागी दुगु खः ।

उगु माग पत्रयात कया थःपिं तसकं सकारात्मक जूगु नाप थःपिंसं केन्द्रीय समितिया बैठकय नं सहलह व्याकेगु जुइ धकाः तर्क नेपाल पत्रकार महासंघया नायः डा. महेन्द्र विष्ट वचं बियादीगु खः । नेवाः पत्रकार दबूया नायः श्रीकृष्ण महर्जन थःपिं नं चितवनय वयेगु जुइ धयादिसें माग पुरा मजुल धाःसा चितवनय जुइगु विशेष साधारण सभाय तर्क थपिं गुगु नं हालतय सुकं च्वनेगु जुइमखु धकाः ख्याचः बियादीगु खः । दबूपाखें विउगु माग २ पेजय...

## ३२ दँ लिपा किपुलिइ 'न्यतभुलु' प्याखं

येँया न्यतया ज्यापुत व उरायतयसं कयना वयाचंगु ऐतिहासिक, सांस्कृतिक नाप धार्मिक रुपं तसकं महत्वपूर्णगु न्यतभुलु अजिमा प्याखं किपुलिइ ३२ दँ लिपा कयनीगु जूगु दु । आइतवाः सनिलय प्यताः इलय किपूया न्हवजालय चंगु जर्सिगाः हितियाथाय फल्चाय वसः पुनेमाःगु खः । आः व फल्चा मदुगुलिं लैय् हे पालं ग्वयाः माःगु पुजा यानाः वसः पुनाः चिथु तँ गयाः लायकुली तप्यंक वनी । उगु प्याखंयात लसकुस याना यंकेत किपूया चिथु व लायकूया धिमे बाजा नाप धाःबाजा थाना यंकीगु जूगु दु । आइतवाः चाखः कथं बहनि प्याखं ल्हइकिसा सोमवाः वैशाख २० गते लायकू दबुलिइ न्हिच्छि प्याखं ल्हइकीगु जूगु दु । थुकिया फुक्क तयारी जुइधुक्कु खं व्यवस्थापन समितिं धाःगु दु ।







## झाजलपा वा:पौ

सल्लाहकार  
श्रीकृष्ण महर्जन  
प्रकाशक:

नजरराम महर्जन  
सम्पादक

श्रीकृष्ण तण्डुकार  
ले-आउट:

ज्वजलपा डेस्कटप  
संवाददाता

भरत महर्जन, निरजमान सिंह  
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४१४०१०७७

ई-मेल : kirtipur\_sandesh@live.com

### सम्पादकिय

## नेवा: देय् दबूया त:मुँज्या गबले ?

नेवा:तयगु राष्ट्रिय संगठन नेवा: देय् दबूया विधान अधिवेशन आइतवा: चितवनय् जूवनाच्वंगु दु । नेवा:तयगु राष्ट्रिय संगठन अले नेवा: ख: धका: सिफारिस बिइगु आधिकारीक संगठन नेवा: देय् दबू ख:सा देय् दबूया त:मुँज्या थनि स्वदै न्हय: येंय जूगु इलय् ल्वापु जुया आ: तक नं स्थगित जुयाच्वंगु दु ।

स्थगित जूगु त:मुँज्या मजुया नेवा:तयसं देय् दबूप्रति भन भन अविश्वास याना वनाच्वंगु ख: । उकिं याना नेवा:त धाईपिं हे नाय: जक जुईपिं अले मा:गु ज्या याइमखुपिं धका: तर्क थुइकेगु याना वयाच्वंगु ख: । त:मुँज्या स्थगित जूगु स्वदै फुइ धुंकूगु अवस्थाय् नं त:मुँज्या पूर्वके मफया अन्तत: बल्लं विधान अधिवेशन यानाच्वंगु दु । विधान अधिवेशन क्वचाये धुंका: स्थगित जुयाच्वंगु त:मुँज्या याइगु जुइ । स्वदै तकया कार्यकाल ला अथें हे फुना वने धुंकूगु दु देय् दबूया ।

लिपांगु इलय् वया नेवा: पत्रकारतयगु राष्ट्रिय दबू नेवा: पत्रकार राष्ट्रिय दबूया त:मुँज्या याना न्हूगु नेतृत्व प्रजातान्त्रिक लोकतान्त्रिक प्रक्रियां ल्ययेगु ज्या जूगु ख:सा यल मंका: खल:या नं त:मुँज्यापाखें नं न्हूगु नेतृत्व ल्ययेगु ज्या जूगु दु । चितवनय् विधान अधिवेशन क्वचाये धुनेवं हे नेवा: देय् दबूया नेतृत्वपाखें यलया मंका: खल: व नेवा: पत्रकार राष्ट्रिय दबूपाखें सयेका लोकतान्त्रिक अभ्यास याना न्हूगु नेतृत्व ल्ययेगु ज्या याकनं याइ धका: आशा याये । स्थगित जुयाच्वंगु त:मुँज्या पूर्वका: न्हूगु नेतृत्व ल्ययेगु ज्या जुल धा:सा नेवा: देय् दबूप्रति नेवा:तयसं अझ अप्व: नुग: क्वसायेकी अले विश्वास याइ ।

### साहित्य/चिनाखं

## हाईकू शौरभ शाक्यया

### शौरभ शाक्य

#### खवप

५५. थथे हे ख:देय्  
सुयां मिखां क्वतगु  
चटकि नेता ।  
५६. गुलिखे कुत:  
ह्वयेमफु सिर्जना  
मखु कंहाल ।  
५७. न्ह्याक्व:संकसां  
ल्वाकबुक ज्वी मफु  
मखु कंहाल ।

५८. न्ह्य:मव:गु चा:  
सिर्जना हावलासा  
मुखु व्यं च्वसा ।  
५९. चा:फु मर्दिन  
बं वाराक्वारा सन  
मुखु व्यं च्वसा ।  
६०. भुखाय या यात्रा  
बं दुनें दुनें चल:  
दुर्गति छुमा: ।

## नेवा: पत्रकार राष्ट्रिय दबूया माग

**नेवा: पत्रकार राष्ट्रिय दबूपाखें  
नेपाल पत्रकार महासंघयात चौलागा  
षष्ठी वैशाख १६ गते बिहिवा:  
बिउगु ज्ञापन पतिइ उल्लेख  
यानात:गु मागत थुगु कथं दु :-**

१ पत्रकारिता क्षेत्रयात समावेशी यायेत नेपाल पत्रकार महासंघया महत्वपूर्ण भूमिका दु । थुज्व:गु अवस्थाय् समावेशीया शुरुआत नेपाल पत्रकार महासंघपाखें जुइमा धैगु नेवा: पत्रकार राष्ट्रिय दबूया माग दु । थुगु महासंघया संशोधित विधानय् उपाध्यक्षपाखे समावेशी व्यवस्था यानात:गुलि थुकी सशोधन याना: आदिवासी जनजाति, महिला, मधेशी लगायत थीथी लागायी पत्रकारपनिगु प्रतिनिधित्व सुनिश्चित यायेमा: धका: ध्यानाकर्षण याका: च्वना ।

२ नेपाली पत्रकारिताया परिभाषायात तसकं चीव्याया रुपय् थुइका: व थुइकेगु यानाच्वंगु दु । खस नेपाली भाषाय् याइगु पत्रकारितायात जक नेपाली पत्रकारिताया दायराय् सीमित यायेगु परिपाटीयात तोडय् याना: नेपालय् ल्हाइगु फुक्क मांभासां याइगु पत्रकारितायात ने नेपाली पत्रकारिताया परिभाषादुने तय्मा:। संविधानया धारा ६ लय् नेपालय् ल्हाइगु फुक्क मांभाय् राष्ट्रभाषात ख: धयात:गु दु । संविधानं स्पष्ट धायेधुंकूगु अवस्थाय् फुक्क भाषां याइगु पत्रकारिता राष्ट्रिय पत्रकारिता ख: । थुगुकथं नेपाली पत्रकारिताया व्याख्या व बुझाईयात त:ब्या: यायेत नेपाल पत्रकार महासंघ मा:गुकथं पला: ल्त्वनेमा:गु दु । संविधानया उगु धाराया व्यावहारिक रुपं ज्यायायेत ग्वाहालि जुइगु कथं मांभाय्या पत्रकारिताया विकास व विस्तारया लागि राज्यपाखें थप सहूलियत, सुविधायी नीतिगत रुपं सम्बोधन यायेत नेपाल पत्रकार महासंघं सहयोगी र प्रभावकारी भूमिका म्हिनेमा: । नेपाल भाषाया माध्यमं पत्रकारिता यानादीम्ह धर्मादित्य धर्माचार्य ( जगतमान वैद्य) वास्तवय् मातृभाषां पत्रकारिता शुरुवात या:म्ह ब्यक्तित्व जूगु अध्ययनं क्यनाच्वंगु दु । उकिं धर्मादित्य धर्माचार्ययात न्हापांम्ह मातृभाषाया पत्रकारया रुपय् घोषणा याकेगु नेवा: पत्रकार राष्ट्रिय दबू आदिवासी जनजाति पत्रकार महासंघया अभियानय् नेपाल पत्रकार महासंघया नं सहयोगी भूमिका जुइमा:गु न्ह्यथनाच्वना । करिब ९० दै न्ह्य: नेपाल संवत् १०४५ स्वांया पूर्णिमा अर्थात वैशाख पूर्णिमा, बुद्ध जयन्तीया दिनय् भारतया कलकतां बुद्ध धर्म नांयागु धार्मिक पत्रिका पिथना धर्माचार्य निर्दलिपा वहे पत्रिकायात बुद्ध धर्म व नेपाल भाषाया नामय् थ:गु हे सम्पादनय् धार्मिक व साहित्यिक पत्रिका प्रकाशन या:गु ख: । सुरुया:गु न्हापांगु दैय् लय्पौ कथं प्यंगू ल्या:, निगूगु दैय् निगू ल्या, स्वंगूगु दैय् निला: पौकथं स्वंगू ल्या:, प्यंगूगु छगू ल्या व न्यागूगु दैय् न्यागु ल्या:तक व पत्रिका प्रकाशित जूगु इतिहास दु । इतिहासया व मांभाय्या पत्रकारिताया सम्मान व नेपालया राष्ट्रिय पत्रकारिताया रुपय् स्थापित यायेत धर्मादित्य धर्माचार्ययात न्हापांम्ह मातृभाषाया

पत्रकारया रुपय् घोषणा यायेगु व वय्क:या विषय राज्य व पत्रकार महासंघया पाखें थप अध्ययन अनुसन्धान यायेमा:गु ख: । नेपाल पत्रकार महासंघया संस्थापक अध्यक्ष सत्यनारायणबहादुर श्रेष्ठयात औपचारिक मान्यता बिइमा: धका: थुगु नेवा: पत्रकार राष्ट्रिय दबूनं अभियान हे न्ह्याका: वयाच्वंगु दु । २००७ सालया प्रजातन्त्र पलिस्था नापं स्वतन्त्रता दय्वं २००८ साल जेठय् (गते लुइके मफुगु) सत्यनारायणबहादुर श्रेष्ठ सभापति व भोजबहादुर सिंह न्यौपाने (छयाञ्जे) दुगु नेपाल पत्रकार संघ पलिस्था या:गु ग्रीष्मबहादुर देवकोटाया “नेपालको छापाखाना र पत्रकारिताको इतिहास” सफुतिइ स्पष्ट नक्सां न्ह्यथनात:गु भी सकसिनं स्यूगु हे ख: ।

२००९ साल वैशाख २२ गते आर्यसमाज मन्दिर भोटाहिटीइ निक्क:गु सभा याना पत्रकार संघया नेतृत्व विस्तार व पुन:गठन या:गु ख: । उकी सत्यनारायणबहादुर श्रेष्ठ (सभापति), प्रेमराज शर्मा (उपसभापति), भोजबहादुर सिंह न्यौपाने (सेक्रेटरी), रामहरि जोशी (ज्वाइन्ट सेक्रेटरी) व रामराज शर्मा (कोषाध्यक्ष) व सदस्यपिं नारायणप्रसाद उपाध्याय, देवेन्द्रराज शर्मा, भीमभक्त जोशी व प्रकाशचन्द्र टन्डन दुगु ख: । पलिस्था जुया: छुं दै लिपा नेपाल पत्रकार संघ निस्कियथें जूगु अवस्थाय् २०१२ चैत १६ गते या:गु मुँज्यां नेपाल पत्रकार संघ ( २००८)या नेतृत्वय् पुन:गठन याना सभापतिइ कृष्णप्रसाद उपाध्याय (भट्टराई) सम्पादक (नेपालपुकार) व उपसभापति फत्तेबहादुर सिंह-सम्पादक -नेपालभाषा पत्रिकायात ल्य:गु ख: । २००८ सालय् नीस्वंगु संस्थायात २०१२ सालय् पुनगठित लिपा अध्यक्ष जूम्ह कृष्णप्रसाद भट्टराईयात नेपाल पत्रकार महासंघया संस्थापक अध्यक्ष मानय् याना: इतिहासया तथ्य हुयाछ्वयेगु व अपव्याख्या यायेगु गलत प्रयास यात । पुन:गठन या:म्हसित संस्थापक अध्यक्ष मानय् यायेफइमखु । वय्क: संस्थापक अध्यक्ष मखु धइगु च्वय् न्ह्यथनागु ऐतिहासिक तथ्यतसें हे स्पष्ट या: । इतिहासया तथ्यया आधारय् नेपाल पत्रकार महासंघया संस्थापक अध्यक्ष कृष्णप्रसाद भट्टराई मखुसे सत्यनारायण बहादुर श्रेष्ठ ख: । थ्वहे तथ्ययात ध्यानय् तया: नेपाल पत्रकार महासंघया संस्थापक अध्यक्ष सत्यनारायण बहादुर श्रेष्ठ घोषणा यायेमा: । थ्व खँ न्ह्यथना नेपाल पत्रकार महासंघं थौकन्हे संस्थापकया रुपय् मानय् याना वयाच्वंम्ह कृष्णप्रसाद भट्टराईप्रति अवमूल्यन यायेत सनागु मखु । मात्र इतिहासया अपव्याख्या व तोडमरोड याये मज्यूगु जिमिगु धापू दु । आधुनिक नेपालया लोकतान्त्रिक चेतना, त्याग, जागरणय् कृष्णप्रसाद भट्टराई छम्ह सम्मानित व अनुकरणीय राजनेता ख: । वय्क:या त्याग, निष्ठा व भूमिका निर्विवाद दु । खास याना: २००७ या राणा शासन विरोधी संघर्षया छम्ह अगुवा नेताया हैसियतय् नेपाली



नेपाल पत्रकार संघया नाय: सत्य नारायण बहादुर श्रेष्ठ व न्हापांम्ह मातृभाषाया पत्रकार धर्मादित्य धर्माचार्य राजनीतिइ वय्कलं म्वाना: च्वंतले तसकं महत्वपूर्ण भूमिका निर्वाह यानादीगु ख: । प्रधानमन्त्रीया हैसियतं २०४७ सालया संविधान जारी याना: २०४६ सालया ऐतिहासिक जनआन्दोलनया उपलब्धि संस्थागत याना अकुण्ठित प्रेस स्वतन्त्रताया कानुनी प्रबन्ध मिलय् याना मुलुकय् स्वतन्त्र प्रेसया प्रवर्द्धन यायेत तर्क वय्क:या ज्व:मदुगु योगदान दु । वय्क:या समग्र योगदानयात नेपाल पत्रकार महा संघया संस्थापक अध्यक्षय् बलपूर्वक सीमित याना प्रस्तुत यायेगु न्यायोचित, जायज व तथ्यगत मखु ।

४. प्यंगूगु माग धयागु श्रमजीवी पत्रकारपनिगु हर्कहितया निंति श्रमजीवी पत्रकार ऐन कार्यान्वयन व न्यूनतम पारिश्रमिक निर्धारण समितिं सिफारिश या:गु विषययात याकनं ज्याव्यलय् हयते पहलकदमी यायेमा व थुगु ज्याय नेवा: पत्रकार राष्ट्रि दबूनं न्ह्यावले ग्वाहालि दैगु विश्वास प्वंकाच्वना ।

५. नेपाल पत्रकार महासंघया सदस्यता इनेगु खँय आ:तक नं छुं छुं दल लिक्कला:पिं पत्रकारपनिगु एक:ति जुयाच्वंगु दु । नेपाल पत्रकार महासंघया विधानं बियात:गु योग्यता पूर्वकूसां अप्व: पत्रकारतसें सदस्य काय मफयाच्वंगु दु । थुकिं लोकतन्त्र व समावेशीया विकासय् टेवा बिइमखु धइगु जिमिगु धारणा दु । लोकतन्त्र व नागरिक अधिकारया निंति ल्वाना वयाच्वंगु नेपाल पत्रकार महासंघं थ:दुनेया संरचना, परिपाटी नं लोकतान्त्रिक यायेमा: । उकिं योग्यता गा:पिं पत्रकारपिन्त बिना भन्फट पत्रकार महासंघया ज: जुइत व सदस्यता आक्हान सम्बन्धि सूचं, सदस्यताया निंति निवेदन ब्यूगु सदस्य ल्या:, नापं सूचं बिइमा:गुपाखे विशेष ध्यानाकर्षण यानाच्वना ।

थुगु नेवा: पत्रकार राष्ट्रिय दबूनं न्ह्यव्यागु थुगु मागत प्राथमिकता साथ तया: सम्बोधन यायेगु सवालय् नेपाल पत्रकार महासंघया वर्तमान पदाधिकारीपिं गम्भीर जुइमा व थ:गु माग सम्बोधन याकेत आन्दोलन व धर्नाय् कुहाँ वयेमा:गु अवस्था अन्त्य याना शान्तिपूर्ण रुपं जिमिगु मागत सम्बोधन जुइगु आशा व विश्वास याना ।

अन्त्य पूर्ण प्रेस स्वतन्त्रताया उच्चतम अभ्यास यायेत नेपाली पत्रकारिताया क्षेत्रय् विविधतायात प्रतिबिम्ब जुइकथं समावेशी जुइमा:गु दु । समावेशीयात ब:लाक स्थापित यायेत मातृभाषाया पत्रकारिताया विकासं पत्रकारिताय् सकसिगु पहुँच व प्रतिनिधित्वयात सुनिश्चित यायेगु जक मखु प्रेस स्वतन्त्रताया अकुण्ठित याइ धइगु नेवा: पत्रकार राष्ट्रिय दबूया विश्वास दु । समावेशी प्रेसया अवधारणां जक प्रेस स्वतन्त्रता अकुण्ठित जुइ ।

# भित्तुना ! भित्तुना !!



विस्वय् बुद्ध धर्म प्रचार प्रसार व बुद्ध दर्शनया माध्यमं शान्तिया सन्देश फैलय्  
यानादीम्ह नेपाल व नेपालीया गौरव, नेपाःया म्हयाय्मचा

सुलक्षण कीर्ति विहारया प्रमुख भिक्षुणी **डा. अनोजा गुरुमां** यात  
वि.सं. २०७२ चैत्र १० गते (सन २०१६ मार्च २३) कुन्हु म्यान्मार सरकारं  
**‘महासधम्म ज्योतिक धज (राष्ट्रिय सम्मान- म्यान्मार सरकार  
२०१६)’** सम्मानित याःगुलिं सकल नेपाःमि गौरवान्वित जूगु दु । थुगु गौरवया  
घडिई म्यान्मार सरकारयात सुभाय बिसें सम्मानित व्यक्तित्व भिक्षुणी डा.  
अनोजा गुरुमायात भित्तुना देछानाच्चना ।

## बुद्ध ज्योति अन्तर्राष्ट्रीय संघ नेपाल शाखा परिवार

चोभार गेट, कीर्तिपुर



## पाँगाय् निन्हुयंक भुखाचं मदुपिन्त लुमंका: मत च्याका श्रद्धाञ्जली



थगुने २०७२ साल वैशाख १२ गते नेपालय् तःभुखाय् ब्यायाः गुद्धःनं मल्याक मनूत सित । उकीमध्ये किपू नगरपालिकाया वडा नं.९,१०,११ व १२ प्यंगु वडा दुगु पाँगाय् जक भिन्त्याम्ह मनूत सित । वहे मदुपिन्त लुमंका: पाँगाय् निन्हू यंक ज्याभवः यात ।

नेपालीतयुसं मानय् याना वयाच्वंगु विक्रम सम्वत कथं वैशाख १२ गतेयात दच्छि दुगु मानय् याना पाँगाया धोकासी त्वालय् ओनस नेपाल, नेपाल रेडक्रस सोसाइटी किपू उपशाखा, सामुदायिक विपद व्यवस्थापन समिति किपू- ९, लुमन्ति आवासको लागि सहयोग समूह, नेपाल मानव अधिकार संगठन किपू शाखाया मंका: ग्वसालय् “श्रद्धाञ्जली तथा दीप प्रज्ज्वलन कार्यक्रम” यात ।

राष्ट्रिय गान हाला न्ह्याकूगु उगु ज्याभवलय् व्वतिकाःपिं सकसिया ल्हातिइ मैनवती ज्वना: छगू मिनेट मौन धारण याना मदुपिनिगु आत्माया चिरशान्तिया कामना याःगु खः । लिपा नेपाःया नक्सा दय्का मत च्याकूगु खः ।

२०७२ वैशाख १२ गते धइगु ईश्वी सम्वत कथं २५ अप्रिल २०१५ खः । २५ अप्रिलयात दच्छि दुगु ताय्का पाँगाय् हे वैशाख



१३ गते सामुदायिक विकास समाज नांगु संस्थां छगू ज्याभवः याना मदुपिन्त श्रद्धाञ्जली बिल । सामुदायिक विकास समाजया नायः हिरावहादुर महर्जनया नायःसुइ जूगु उगु ज्याभवः समाजया छयाञ्जे गुजय सिंह न्ह्याकूगु खः । मूपाहाँ समाजसेवी एवं जनसेवा उच्च मा.वि.या प्राचार्य नन्दकुमारी महर्जनं त्वारवालय् मत च्याका: ज्याभवःया उलेज्या यानादीगु खः । मदुपिंमध्ये ९गुम्हसिया किपा: भवःलाक तया: स्वादेछाना: श्रद्धाञ्जली देछाःगु खः । स्वादेछाय्गु भवलय् थः भाःत व निम्ह छय्पिं पाखें तापाक्क च्वनेमाःम्ह छोरी महर्जनं नुगः चिइमफया दिनिदिनिं खयाबिल । छभाःला अन दुपिं सकसियां मिखाय् खबि लःलः धायेका बिल ।

नेवाःत व नं बुराबुरिपिं अप्वः दुगु थासय् नुगःखँ तःपिं अप्वःसिनं खयभासं न्वंवाःबलय् न्यनामिपिनि म्हाइपुका च्वंगु मूपाहाँ नन्द कुमारी महर्जन (नानी मिसं) नेवाः भासं न्वंवाबलय् सकलें भावुक जुल । अनया लकस शान्त जुल । वय्कःया खँ न्यनाः अन दुपिं बुराबुरिपिन्सं धात्थेंया सरस्वती हे खः धकाः प्रशंसा नं यात । ज्याभवःया लिपांगु इलय् छगू मिनेट मौन धारण याना: सकसिनं मत च्याका: निर्वाण कामना याःगु खः ।

## किपुली सुचुपिचुया ज्याभवः



क्लिन काठमाडौं ग्रिन काठमाडौं अभियानं म्हिगः सनिवा: किपुली सुचुपिचु ज्याभवः यात । थ्व अभियानं सुचुपिचु यायेगु ज्या न्ह्याका: वयाच्वंगु न्हयगु वा: दत । चैत्र ६ गतेनिसें विश्व सम्पदाय् लाःगु, ऐतिहासिक व धार्मिक थासय् सरसफाई याना वयाच्वंगु खः ।

न्हय्गूगु वालय् अर्थात चैत्र १८ गते सनिवा: किपूया बाघ भैरव परिसरय् मुन । सहभागित यक्व दुगुलिं इमित स्वंगु ब्वय् ब्वथल । बाघभैरव गुथिया नायः शुद्ध महर्जनया नायःसुइ बाघभैर व परिसर सुचुकुचु यायेगु जिम्मा बिया: सुचुकुचु याकेगु ज्या जुल । अथेहे बुद्धिबहादुर महर्जनया नायःसुई क्वाच्वः (उमा महेश्वर) लागा सुचुपिचु यायेगु भाला बिलस चिलंचो जगतपाल महाविहार सुचुपिचु यायेगु जिम्मा केशरत्न वज्राचार्यया नायःसुई बिल । उगु सुचुपिचु यायेगु ज्याभवलय् स्वंगु थासय् नं यक्व हे स्थानियबासी पिनिगु सहभागिता खनेदु ।

उगु पुचलय् आई कीर्तिपुरया पिनिगु नं ब्वति दुगु खः । आइतवा: लाय्कुली डतभुल अजिमाया छः प्याखँ क्यनीगु जूगुलिं बाघभैरवस्थान, सतःक्व, लायकू व उमामहेश्वर न्यंकनं सुचुपिचु याःगु खः । थुज्वःगु सिचुपिभु इलय् ब्यलय् जुया हे च्वनेमाः ।

अथे हे समुदाय प्रहरी सेवा समिति अन्तरगत सरसफाई उपसमितिं भिगु वा:निसें किपूया थीथी थासय् सुचुपिचु याना वयाच्वंगु खः । भिगूगु वा:या सुचुपिचु किपूया टाउन प्लानिगय् नं म्हिगः सनिवा: यात ।

## संघर्षपाखें आंशिक माग पुरा, रथ दयेकेगु ज्या सुरु

जायज माग तया इलय् हे सतक संघर्ष यात धाःसा नेवा: सांस्कृतिक ख्यलय् नं माग पुरा जुइगु उदाहरण जुया बिउगु दु बृंगद्यःया रथ दयेकीपिं व जात्रा याइपिं सरोकारवालातय्गु गुथिं याःगु संघर्ष । सतकय् क्वहां वया: मखुसां थःपिनिगु माग पुरा यायेमा: धका: माग याना गुथि संस्थानयात दबाव बिइगुनिसें राजीनामा बिइगु तकं सम्बन्धित गुथियारतय्सं यानादीगु खः ।

बृंगद्यःया रथ जात्राया भवलय् घःकू नकीपिनिगु गुथि घःकू गुथिया फुक्क गुथियारतय्सं राजीनामा तकं बियादीगु खःसा पौया ज्या याइपिं यंवाःतय्गु यंवाः गुथि व बृंगद्यःया रथ दयेकेगु भवलय् रथ दयेकेगु अर्थात सिंयागु फुक्क ज्या याइपिं बाराहीतय्गु बाराही गुथिपाखें नं थःपिन्सं ज्या याये फइमखुत धका: ख्याच्वः बियादीगु खः । अथे सम्बन्धित गुथिपाखें राजीनामा नापं ख्याच्वः बिउगुयात कया नेवा: संचारकःमितय्सं थःथःगु संचारमाध्यमतपाखें प्रचार प्रसार यायेगु ज्या याःगु खः ।

लगातार रुपं प्रचार प्रसारया माध्यमं दबाव जुइवं अन्ततः गुथि संस्थानं पूर्वक माग पूरा मयाःसां नं आंशिक माग पुरा यायेगु ज्या याःगु दु ।

नेवाःतय्गु गौरव जुयाच्वंगु बृंगद्यःया रथ जात्रा खःसा रथ दयेकेगु ज्या व जात्रा नाप स्वापू दुगु स्वंगू गुथिया आंशिक माग पुरा जुइवं रथ दयेकेगु ज्या सुरु जूगु दु । गुथि संस्थानं आंशिक रुपं माग पुरा याना बिउगुलिं वंगु ११ गते शनिवा: पारुया दिनिसें बृंगद्यःया रथ दयेकेगु ज्या शुरु जूगु खः । उखुन्हु हाम्वः की स्वना पूच्वय् रथ दयेकेगु ज्या जूगु खः ।

रथ दयेकेगु भवलय् सिंयागु ज्या याइपिं बाराही गुथि, पौया ज्या याइपिं यंवाः गुथि व घःकू नकेगु ज्या याइपिनिगु घःकू गुथिया आंशिक माग पुरा जूगु खःसा छुं छुं माग धाःसा ल्यंदनि ।

बाराहितय्त छन्हुया ज्यामि ज्याला ७ सय ५० बियातःगु थासय् १२ सय यायेमाःगु माग याःगु खःसा आः ९ सय थ्यंका बिउगु दुसा अथे हे पुजा खर्चया नितिं जिन्सी व नगद याना ६० हजार बियातःगु थासय् आः १० हजार तका थप याःगु दु ।

अथे हे यंवातय्त न्हापा ज्याला ८ सय यानातःगु थासय् १२ सय याना बिउगु दुसा न्हापा पुजा खर्च बिया मतःगु थासय् आः २० हजार बिइगु जूगु दु । उगु हे कथं घःकूतय्त धाःसा न्हापा

साहित्य/चिनाखं

भट्टी पसः



धनी जुइगु इच्छा मदुम्ह सु दै  
तर सकलें धनी जुई फैमखु  
मौकाय् कमाय् याय्सःपिं जक  
धनी जुई फै धेगु सर्वमान्य खः ॥

मौकाय् चौका ह्वाय् सपिन्तः

भीसँ सुभाय् बिइ हे माः

वय्कःपिनि भविष्य उज्ज्वल

छाय् मजुई धेवां धेवा सालेगु समय खः ॥

नां यागु खँ तोता

दाँ वैगु ज्या हे ठीक ताल

दाँ मदय्क नां मदुगु जमाना थ्व

दाँ सालेत अपुगु ज्या खः भट्टी पसः ॥

राजनिती यायेत अनुभव मदु

कार्यकर्ता जक जुयां छुयाय्

नां नं मदु, दाँ नं मदु

न्ह्यावलें ल्हाः हुसुलुं प्वाः फुसुलुं ॥

दां कमाय् याय्गु खःसा वहे खः

छवय्ला, कचिला, माय् वः नका

अय्ला थ्वं त्वंका लठ्ठ जुइका

दिल्ली हाँकय् याना गफ नं ॥

न्यने दैगु थाय् नं भट्टी पसः खः

भट्टी वय्गु बानी जुया

सुयां परिवारे समाजय त्वापु जूसां

छुं सारोकार तय्म्वाः याउँसे च्वं ॥

आंशिक माग पुरा जुइ धुंका: रथ

जात्राया नितिं यलया पूच्वय् बाराहीतय्सं

बृंगद्यःया रथ दयेकेगु ज्या यानाच्वंगु लू



पुजा खर्च बिया मच्वंगु थासय् आः २० हजार तका बिइगु धका: निर्णय याःगु खः ।

बाराही, यंवाः व घःकूतय्सं माग याना वयाच्वंगु जेन्सीयात थौकन्हय्या भाः कथं ध्यवा थप यायेमाःगु ज्या धाःसा याःगु मदुनि । घःकूतय्त ४८ मुरी वा बिया वयाच्वंगु दुसा यंवाःतय्त २४ मुरी व बाराहीतय्त ३० मुरी वा बिया वयाच्वंगु दु । जेन्सीया रुपय् बियातःगु वा थौकन्हय्या भाः कथं ध्यवा थप यायेमाःगु माग कायम हे दु धका: स्वंगूया गुथियारतय्सं धयादीगु दु ।



# अन्धविश्वासय् लिकुनाच्चंगु विज्ञान



(नेवा:तय्सं न्हापानिसं थथे याये मत्यः अथे याये मत्यः धका: धया वयाच्चंगु दु। थौ वया उक्रियात अन्धविश्वास धायेगु या:। याये मत्यः धयात:गुया थीथी कारणत दु। उगु कारणयात कुला स्वयेगु ज्या यात धा:सा अन दुने विज्ञान दु। उकिं पन्नारत्न महर्जनं अज्व:गु हे अन्धविश्वासय् लिकुनाच्चंगु विज्ञानयात कया सफू हे च्यादीगु दु। सं)

## जातः चिप याये मत्यः

जातः मनूतय् आगं खः। जातखय् मनूया मां वीया नं वयागु पहिचान दक्वं च्यातइ। ज्योतिष शास्त्रकथं थ्व छगू मनूया दस्तावेज खः।

जातः चिप याये मत्यः धयागु लोकमान्यता दु। छाये व छु जुया: याये मत्यः धयागु खँय् जातः जूगुलिं जक धायेगु यानावयाच्चंगु खनेदु। पुर्खापिसं अथे मत्यः जक धयात:गु अवस्थ खइमखु। थुकी छकः विचा: याये।

मनूया जातः मनू बुइ धुंका: दयेकीगु खः। मसीतले थ्वयात सुरक्षित यानातइ। मनू मसीकं थ्वयात नष्ट याइमखु। सीबलय् तिनि सीम्हेसिया लिसे उना: बाय् नष्ट याना छवइ। मनूया आयू गुलि दइ धका: धायेफइ मखु। मनू मसीतले ल्यंका तयेमा:गु जातः सिर्तिमिति वस्तुखं (भ्वतँ) दयेकां उलि बल्लाइ मखु, तःदँतक ल्यनाच्चनी मखु। उकिं जातः दयेकेत विशेषकथंया वस्तु छयली।

जातः नेपाली (लोकटा) भ्वँतय् च्यातइगु खः। भ्वँ भचा ख्वातुगु मा:। उकिं निव: स्वव: भ्वँ तया: म:नं प्यपुंका: ख्वातुका तइ। म किलं नयेय:गु चीज खः। थुकिंयाना: ता:तक तयातये जिइ मखु। उकिं म: दयेकेबलय् म: दयेकेगु चीज नापं हरिताल धयागु छगू ब्वति ल्वाकछ्याना: दयेकी। थ्व ब्वति विषादि खः।

जातः च्वइगु भ्वँया सतह पिचुसे च्वनी। पिचुकेत हरिताल ल्वाकछ्यानात:गु म: सालुगु कापतय् छानय् याना: भ्वँतय् इली। भचा न्हंगं थें च्वन धायेवं पिचुसे माथं वंगु त्वहं बाय् मेगु छुं नं छा:गु वस्तुया द्य:ने तया: उतिग्यंक छयाइ। जातः च्वयेबलय् गनं आख: हुइमाल बाय् हुया: मेगु आख: च्वये माल धायेवं नं हरिताल ल्वाकज्या:गु म: इला: हुइ। थथे हुइबलय् टिपेक्स हुयात:गु थें छुं कथंया चिं खनेदइमखु। जुइबलय् भ्वँया सतहलय् यक्व विषया भाग दयाच्चनी।

जातः चिप याये मत्यः धयागु गनं चिपनाप ल्वाकेगु बाय् चिपगु थासय् यंकेगु मखु। जातः थियाच्चनागु ल्हा: म्हुतुइ यंकेगु बाय् छकःपतिं ई भ्या: कया: जातखय् थीगु खः। नयाच्चनागु नसाया नापं यंकेगु खः। थथे यायेबलय् जातखय् च्वंगु विषादि नसाय् बाय् म्हुतुइ लाना: विष लगय् जुइ। उके जातः थी धुंका: ल्हा: सिलेमा: धयागु मान्यता नं दु।

जातः ता: ईतक सुरक्षित यानातयेमा:। ला:थेपा:थे याना: वायेत्य: फवायेत्य: यानातये मज्यू। आख:ग्व: बांलाक सीदयेका तयेमा:। मखुसा अर्थया अनर्थ जूवनेफु। चिप आदि थासय् लाना: लखं प्यात बाय् धुलं गल धायेवं याकनं भ्वाथ: जुइ। थज्या:गु अवस्थाय् जातः स्वयेमाल धायेवं आख: स्पष्ट मजुइफु।

जातः जक चिप याये मज्यूगु मखु। हरिताल बुलात:गु छुं नं भ्वँ चिप याये मज्यू। अप्व: याना: पुलांपुलागु सफूत हरिताल इलात:गु भ्वँतय् च्यात:गु जुइ। सफू चिप याये मत्यः



पन्नारत्न महर्जन

जातः च्वइगु भ्वँया सतह पिचुसे च्वनी। पिचुकेत हरिताल ल्वाकछ्यानात:गु म: सालुगु कापतय् छानय् याना: भ्वँतय् इली। भचा न्हंगं थें च्वन धायेवं पिचुसे माथं वंगु त्वहं बाय् मेगु छुं नं छा:गु वस्तुया द्य:ने तया: उतिग्यंक छयाइ।

धयागु मान्यता नं थ्व हे हरितालं याना: खः। थन नं चिप यायेगु धयागु ईभ्या: कया: सफूया पाना पुइकेगु व नयाच्चनाथाय् सफू यंकेगु खः।



## मांयात सम्मान यायेगु नखः मांया ख्वा: स्वयेगु

श्रीकृष्ण महर्जन

स्वनिग:या आदिवासी नेवा: समाज दुनेया संस्कृतियात स्वल धा:सा विविधता दु।

संस्कृति धइगु सामुहिक कथं हनीगु ज्या खः। अथे संस्कार स्वल धा:सा नं विविधता दु। संस्कार धाइगु मनूयात योग्य यायेगु निती याइगु कर्मकाण्ड खः। संस्कृति व संस्कारया ल्याखं नं विविधता नेवा: समाजय् दयाच्चंगुया मूल कारण धइगु बौद्ध व हिन्दू धर्मनाप स्वानाच्चंगुलिं नापं थीथी दर्शनपाखें प्रभावित जुयाच्चंगुलिं हे खः। अथे थीथी धर्म व दर्शन नाप स्वानाच्चंगु जूसां आखिर नेवा:तय्सं थ:गु हे पहलं संस्कृति हना वयाच्चंगु दु। मेपनिगुपाखें प्रभाव ला:सां नं थ:गु हे पह:यात निरन्तर



ता बिया वयाच्चंगु नेवा:तय्गु थ:गु हे कथंया विशेषता खः।

थ:गु न्हिया न्हिथंया जीवनय् मा:गु हलज्वलंयात तकं पुजा याना छगू कथं द्य:या रुपय् हना वयाच्चंगु तसकं सभ्य कथं नालात:पिं धइगु स्वनिग:या आदिवासी नेवा:त खः।

नेवा:तय्सं थ:पिगिनु जीवनय् प्रयोग याइगु ल्वाभ:निसें म्हा मफइगु इलय् लंका: बिइम्ह धका: थीथी द्य:यात पुजा आज्ञा

याना वयाच्चंगु दु। गथे कि न्हायपंस्या: द्य:, वास्या: द्य: जक मखु जीवनय् मा:गु कथंया ख्यालि द्य:यात तकं पुजा याना वयाच्चंगु दु। उलि जक मखु जीवनय् मदयेकं मगा:गु खुसिनिसें चायात तकं पुजा आज्ञा याना वयाच्चंगु दु। थुकथं जीवनय् प्रयोग जुइगु सामाननिसें जीवनय् मदयेकं मगा:गु वुं वइगु अन्तयात तकं पुजा याइगु नेवा:तय्गु मौलिक पह: खः।

थथे थीथी कथंया सामाननिसें जीवनय् प्रयोग जुइगु फुक्क पक्षयात पुजा आज्ञा याना वयाच्चंगु नेवा:तय्सं थ:त जन्म विउम्ह मां व अबुयात नं तसकं सम्मान याना द्य: भा:पिया वयाच्चंगु दु।

मनू हे द्य: जुइगु दर्शन ज्वना च्वंगु नेवा: समाजय् विशेष कथं मां, अबु व गुरुयात तसकं

हनीगु अले द्य: भा:पिइगु चलन दु। व हे मां, अबु व गुरुया प्रतिक हे नास: द्य: ख: धाइ। उकिं नास: द्य: दुथाय् स्वंगू प्वा: दइ मखुसा व स्वंगू हे प्वा:या मंका: रुप कथं छगू प्वा: जक नं तयात:गु दइ। नास: द्य: धइगु मां, अबु व गुरु ख: धका: नेवा: संस्कृतिविदतय्सं धायेगु याना वयाच्चंगु जूसां लिपांगु इलय् वया नास: द्य: धाइम्ह महाद्य: धका: तकं ब्याख्या याना नास: द्य:यात हिन्दूकरण यायेगु ज्या जुयाच्चंगु खनेदु। न्ह्यागु हे जूसां थपिन्सं हने मा:पिन्त तसकं हनाबना तइगु नेवा: समाज खः।

नेवा: समाजय् अबुयात गुरु कथं सम्मान याइ उगु हे कथं मांयात नं सम्मान याइगु चलन दु। द्धिछया दुने मांया ख्वा: स्वयेगु दिं हे क्व:छिना थ: मांयात सम्मान यायेगु अले जीवनय् संघर्ष याना न्ह्या: वने फयेमा धका: पञ्चतत्वया शरिरय् पञ्चतत्वयात सन्तुलित याना तयेगु कथं पञ्चतत्वया प्रतिक कथं खें सगं बिइगु चलन दु मांया ख्वा: स्वयेगु इलय्। संघर्षवादी सिद्धान्त ज्वनाच्चंगु खें सगं बिया मांयात तसकं सम्मान यायेगु नाप नापं भ्वय् तकं नकीगु चलन धइगु नेवा: समाजय्।



स्वनिग:या आदिवासी नेवा:तय्सं तिथि हे क्व:छिना न्हापानिसें मांया ख्वा: स्वायेगु याना वयाच्चंगु ख:सा लिपांगु इलय् वया स्वनिगलय् च्वपिं मेमेपिन्सं नं मांया ख्वा: स्वायेगु दिनय् थ: मांयात सा:सा:गु नक: वनेगु चलन यानाह:गु दु।

चन्द्रमास कथं अर्थात तिथि कथं नेपाल संवतया चौलागा आमाइ खुन्हु मांया ख्वा: स्वयेगु याइ। गुला गुला तक प्वाथय् तया निगू जीवन हना थ:त जन्म विउम्ह मांया गुणयात लुमंका: थ:त जन्म विउम्ह मांयात सम्मान यायेगु कथं तिथि हे क्व:छिना नेवा:तय्सं मांया ख्वा: स्वयेगु ज्या याना वयाच्चंगु दु। थ:गु जीवनय् न्ह्याक्व हे लिमला:सां मांया ख्वा: स्वयेगु

दिनय् अवश्य नं सकलसिनं थ: थ: मांयात छक लुमंकी नेवा:तय्सं।

तापाक्क वनाच्चंगु प्म्याय् मचा जूसां अले काय्मचा जूसां, ब्यागलं च्वनाच्चंगु जूसां मांयात लुमंका: मांया स: न्यनेगु अले मांयात सगं बिइगु, भ्वय् नकेगु वा मेगु छुं नकेगु निती मांयात लुमंकी। अले मांया ख्वा: स्वइगु दिनय् थ: मांया जीवनय् वयेफुगु समस्यायात समाधानया निती संघर्ष याना वने फयेमा: धका: हे सगं बिइगु चलन दु नेवा: समाजय्। इहिपा: जुइ धुंकापिं प्म्याय् मस्त ला मांया ख्वा: स्वायेगु निती थ:छेंय् हे वइगु चलन दु। कथंहं.....

## पांगागा लाछिइ गथु प्याखं क्यन



सांस्कृतिक व ऐतिहासिक महत्वं जा:गु किपूया गथु प्याखं बाघभैरव प्याखं नं धायेगु या: । भिनिदैय छक: क्यनीगु थुगु प्याखं किपूया पांगा, नगामय नं क्यने यनेमा: । वहे नियमकथं वंगु वैशाख १० व ११ गते नगामय क्यने धुंकूगु दु । वयां लिपा वंगु वैशाख १७ गते शुक्रवा: पांगाया पिगं छ: भाजंगलय् ख्वा:पा ब्या: ख्वा:पा पुना: पांगाया व:गु ख: । पांगाया दिख्यलय् च्वम्व बालकुमारी छ:याथाय् प्याखं हुला: कुमारी इनातुले धुंका: बहिनी बाचा तक पांगाया लाछि क्यनेह:गु ख: । चान्हय् क्यनीगु जुया वयात चाख: धाई सा, सनिवा: न्हिनय् लाछि दबुली प्याखं क्यन । न्हिनय् क्यनीगु प्याखंयात न्हिख: धायेगु या: ।

थुगु प्याखं ल्हइकेगु नितिं पांगाया प्यंगू गुथिं खर्चया व्यवस्था या:गु खं । संयुक्त गुथिया नाय: हिराबहादुर महर्जन कनादि ।

## नगां ज्ञानमालां नरवहादुरयात लुमंकल

मनु जन्म जुइगु हे सिद्धि ख: । थौतक सुं नं मनु सिद्धिवा:पिं धइपिं मदु । इमिसं यानावंगु ज्यां याना: अमरजूपिं यक्व दु । नगां ज्ञानमाला भजन खल:या संस्थापक नाय: नापं संरक्षक नरवहादुर महर्जन वंगु वैशाख १ गते दिवंगत जुयादिल । थ्वया भिंछन्हु न्ह्य: वय्क:या जहान मदुगु ख: । जहानया घ:सू हे सिमध:वं वय्कलं नं थ्व संसार त्व:ता भाल ।

वय्क:या लुमन्ति म्हिग: शैखाख १८ गते सनिवा: नगां ज्ञानमाला भजन खल:नं बालकुमारी छ:गलय् वय्क:या निर्वाण कामनायासं श्रद्धाञ्जली सभा यात । हिरा डंगोलं ज्याभव: न्ह्याकेगु भवलय् वय्कलं नगां ज्ञानमाला भजन खल: गुगुकथं पलिस्था याना दिल, वय्क:या छु देन दु धका: व्याक्क खं कनादिल । वय्कलं भजन स्यनादीपिं मिसापिनि पाखें नं वय्क:या योगदान वारे चर्चा यानादिल । वय्क:या छें हे भजन सयक: वनेबलय् भतिचा हे थाकु मचासे निम्हतिपूसें नं तसकं ग्वाहालि याइगु खं न्ह्यथनादिल ।

ज्यापु महागुथि किपू नगरसमितिया नाय: नजरराम महर्जनं ज्यापु महागुथिया आजिवन



ज: दयेकेगु खंय् वय्कलं यानादीगु योगदानया वारे चर्चा यानादिल । ज्ञानमाला भजन खल: केन्द्रया निवर्तमान नाय: शान्तराज शाक्यजुं नं वय्क:या ज्ञानमाला भजनप्रतिया भावना च्वछाये बह:जु धयादिल । छगू मिनेट मौन धारण याना: वय्क: व वय्क:या जहानया किपालय् खादां वखाय्का: स्वां देछाना श्रद्धाञ्जली ब्यूगु ख: ।



## किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थ:गु प्रति सुरक्षित यानादिसं


### सफू दइगु थाय्

- १) खपया च्याम्हसिंहया स्टेसनरी पस: (श्याम सुन्दरया पस:)
- २) खप कमल विनायकया स्टेसनरी पस:
- ३) किपूया सत:क्वया स्टेसनरी पस:
- ४) किपूया देय् पुगूया बाघभैरव स्टेसनरी पस:


- ५) किपूया पांगा दोवाटोया किपू बूक प्वाइट
- ६) यैया भोताहिति नातिबज्रया पस:
- ७) यैया कुलाभुलिइ च्वंगु मंका: धुकू पस:
- ८) यल, यल ध्वाखा अर्जुन स्टेसनरी पस:
- ९) स्वापू नितिं मेमेगु फोन नम्बर: ४३३४०१३, ९८४१७५२५८३, ९८४६०४६१२३९

मू  
सिच्छि तका जक (१००/-)

## निर्वाण कामना



जन्म: वि.सं.  
१९९२/१०/२३



स्व. आसमान महर्जन

मदुगु दिं : वि.सं.  
२०७२/१२/०५



अमल्लि भाजु पुच:या दुज: ओम प्रकाश महर्जनया अबु आसमान महर्जन वंगु २०७२ चैत्र ५ गते आकाभाकां मदुगु थौ लत्याया पुण्यतिथिसं सुखावति भुवनय बास लायेमा धका: निर्वाण कामनायासं श्रद्धाञ्जली देछाना च्वना । नापं दु:खया इलय् छेंज:पिन्सं मनचिइ फयेमा: धका: विचा: हायेका च्वना ।

### अमल्लि भाजु पुच:या पासापिं

नाय: ज्ञानरत्न बज्राचार्य

सचिव: महेशवहादुर श्रेष्ठ

कोषाध्यक्ष : दिल कुमार महर्जन

दुज:पिं : गणेशवहादुर महर्जन

“ “ : नयन श्रेष्ठ

“ “ : ज्ञानेश्वर महर्जन

“ “ : शिवहरि महर्जन

“ “ : रादिप महर्जन

“ “ : कृष्ण गोपाल महर्जन

“ “ : हरिकृष्ण महर्जन

“ “ : स्वयम्भुरत्न बज्राचार्य